

CAPUT IX.

VENATIONIS DESCRIPTIO.

1. PATRE defuncto *Kosalæ* imperium adeptus *DASARATHAS*, magno curru vectus, qui meditatione sensus devicerat, regnabat, inter omnes modestos et regnantes primum tenens locum.
2. Universus imperii orbis, cum omnibus urbibus, ejus stirpi commissus, quia ille acceptum juste moderabatur, ejus, *KÁRTIKEYÆ* robore præditi, virtutibus addictus erat.
3. Utrumque, et *BALÆ* occisorem, et hunc principem, a *MANUE* rege oriundum, quia opportuno tempore remunerabantur homines officium servantes, viri sapientes lassitudinis abactores appellabant.
4. In terra ejus ne morbus quidem pedem figebat, nedum clades ab hostibus : solum uberrimos fructus præbebat, sub imperio *AJÆ* filii, tranquillitate gaudentis, atque immortalium instar splendentis.
5. Qua felicitate fruita erat terra per *RAGHUEM*, decem plagarum victorem, atque post eum per *AJAM*, eadem iterum lucebat, principem adepta, haud inferiore robore præditum.
6. Æquitate sua, divitiarum imbres effundendo, improbosque coercendo, rex *YAMAM*, *KUVERAM* atque *VARUNAM* æmulabatur, sed splendore suo solem, cum *ARUNA* conjunctum.
7. Neque venationis deliciæ, neque alea, nec vinum, lunæ instar suave, nec puella florentis ætatis, abripiebant illum, qui ad prosperitatem adnitebatur.
8. Neque verbum humile, ne ad *INDRAM* principem quidem, nec verbum falsum, ne in fabulis quidem, per jocum narratis, nec verbum asperum, ne ad inimicos quidem, dicebatur ab illo, ira libero.